

**ეთიკის კომისიის
რეკომენდაცია**

ეთიკის კომისიის შემადგენლობა:

კომისიის თავმჯდომარე: ეკატერინე გასიტაშვილი

კომისიის წევრი: დავით კაკაბაძე

კომისიის წევრი: ირაკლი შონია

კომისიის წევრი: ცირა შუბითიძე

კომისიის წევრი: გიორგი ბეგიაშვილი

კომისიის წევრი: ემზარ პაქსაძე

კომისიის წევრი: ლავრენტი ქავთარაძე

კომისიის წევრი: კობა ბოჭორიშვილი

კომისიის წევრი: დავით კვაჭანტირაძე

შეკითხვის კომისიაში შემოსვლის თარიღი: 15.10.2013

შეკითხვის რეგისტრაციის ნომერი: 018/13

შეკითხვა:

გთხოვთ მაცნობოთ, მაქვს თუ არა უფლება ბლანკზე და ბეჭედზე გამოვიყენო ს.ს.ი.პ. საქართველოს ადვოკატთა ასოციაციის ლოგო?

ანალიზი:

„ადვოკატთა შესახებ“ საქართველოს კანონის პირველი მუხლის მეორე პუნქტი: „ადვოკატი არის თავისუფალი პროფესიის პირი, რომელიც ემორჩილება მხოლოდ კანონსა და პროფესიული ეთიკის ნორმებს და გაწევრიანებულია საქართველოს ადვოკატთა ასოციაციაში.“

„ადვოკატთა შესახებ“ საქართველოს კანონის 22-ე მუხლი: „საქართველოს ადვოკატთა ასოციაციის სიმბოლიკას ამტკიცებს ასოციაციის საერთო კრება აღმასრულებელი საბჭოს წარდგინებით.“

საქართველოს ადვოკატთა ასოციაციის წესდების მე-12 მუხლის მე-2 პუნქტის „თ“ ქვეპუნქტი: „საერთო კრება დამსწრეთა უმრავლესობით, აღმასრულებელი საბჭოს წარდგინებით, ამტკიცებს ასოციაციის სიმბოლოკას.“

საქართველოს ადვოკატთა ასოციაცია სამართლებრივ ურთიერთობებში გამოდის, როგორც სამართლის დამოუკიდებელი სუბიექტი, საჯარო სამართლის იურიდიული პირი. ამ ურთიერთობაში მისი ერთ-ერთი განმასხვავებელი ნიშანია ასოციაციის სიმბოლიკა. ასოციაციის სიმბოლიკის დამტკიცება ასოციაციის საერთო კრების კომპეტენციაა, ხოლო მისი შემუშავება და წარდგინება აღმასრულებელი საბჭოს მიერ ხდება. სწორედ აღნიშნული სიმბოლიკის ნაწილია საქართველოს ადვოკატთა ასოციაციის ლოგო, რომელიც მიიჩნევა ადვოკატთა ასოციაციის კუთვნილებად, მიუხედავად იმისა, რომ მისი გამოყენება კანონით ცალსახად არ არის აკრძალული.

შეკითხვაში დასმულ საკითხთან დაკავშირებით არ არსებობს ვრცელი საკანონმდებლო რეგულაცია. განსახილველ შემთხვევაში, ეთიკის კომისია განმარტავს, თუ რამდენად მიზანშეწონილი და რეკომენდირებულია საქართველოს ადვოკატთა ასოციაციის ლოგოს გამოყენება სატიტულო ფურცელზე - ე.წ. „ბლანკზე“, ბეჭედზე და მსგავს ატრიბუტებზე, როგორცაა სავიზიტო ბარათი, სარეკლამო ბანერი, მიმართვის ფურცელი, ორდერი და სხვა.

„ადვოკატთა შესახებ“ საქართველოს კანონის პირველი მუხლის მე-2 პუნქტის მიხედვით, საადვოკატო საქმიანობის განხორციელების უფლებამოსილება აქვს ადვოკატთა ერთიან რეესტრში ინდივიდუალურად რიცხულ, ასოციაციაში გაწევრიანებულ ფიზიკურ პირს. თავად ს.ს.ი.პ. საქართველოს ადვოკატთა ასოციაცია განიხილება, როგორც სამართლის დამოუკიდებელი სუბიექტი, რომელიც დამოუკიდებლად, საკუთარი სახელით, როგორც ადვოკატთა ასოციაცია, გამოდის მესამე პირებთან ურთიერთობაში. ადვოკატის, როგორც ფიზიკური პირისა და საადვოკატო ბიუროს, როგორც კონკრეტული ორგანიზაციულ - სამართლებრივი ფორმის მქონე იურიდიული პირის გაიგივება საქართველოს ადვოკატთა ასოციაციასთან დაუშვებელია. ადვოკატთა ასოციაციის სიმბოლიკის შესახებ, ჰიპოთეტური შეკითხვის ფარგლებში დასმული საკითხის, ლოგოს სატიტულო ფურცელზე, ბეჭედზე

გამოყენების შემთხვევაში, მესამე პირებს შესაძლოა შეექმნათ მოსაზრება, რომ კონკრეტულ შემთხვევაში მოქმედებს ს.ს.ი.პ. საქართველოს ადვოკატთა ასოციაცია და არა კონკრეტული ადვოკატი ან საადვოკატო ბიურო (ფირმა, კომპანია და ა.შ.).

ადვოკატთა ასოციაციის ლოგოს გამოყენება სატიტულო ფურცელზე (ე.წ. “ბლანკი”), ბეჭედზე და სხვა მსგავს ატრიბუტებზე შეიცავს საფრთხეს, რომ კონკრეტული ადვოკატის ან საადვოკატო ბიუროს გაიგივება მოხდება ადვოკატთა ასოციაციასთან, რომ სწორედ ადვოკატთა ასოციაცია არის ურთიერთობის მონაწილე სუბიექტი.

ასოციაციის სიმბოლიკის გამოყენება კლიენტებთან, სასამართლოსთან და სხვა მესამე პირებთან ურთიერთობისას, შესაძლოა შეცდომაში შემყვანი აღმოჩნდეს ამ უკანასკნელთათვის და მათ მცდარად მიიჩნიონ, რომ კონკრეტული ადვოკატის თუ საადვოკატო ბიუროს პოზიცია, რომელიც გადმოცემულია ადვოკატთა ასოციაციის ლოგოთი დატანილ სატიტულო ფურცელზე ან სხვა დოკუმენტზე, რომელიც დადასტურებულია ადვოკატთა ასოციაციის ლოგოს გამოყენებით დამზადებული ბეჭდით, არის ს.ს.ი.პ. ადვოკატთა ასოციაციის, როგორც თავისუფალი პროფესიის წარმომადგენელ პირთა მრავალრიცხოვანი (დღეის მდგომარეობით ასოციაციაში 4000-მდე ადვოკატი ირიცხება) კორპორაციის ერთიანი, ასოციაციის სახელით გაცხადებული პოზიცია.

ეთიკის კომისია მიიჩნევს, რომ ადვოკატის, როგორც ფიზიკური პირის, ასევე საადვოკატო ბიუროს (ფირმის, კომპანიის და ა.შ.), როგორც ორგანიზაციულ-სამართლებრივი ფორმით რეგისტრირებული იურიდიული პირის საიდენტიფიკაციო ატრიბუტიკა და რეკვიზიტები მკაფიოდ და ცალსახად უნდა იყოს განსხვავებული ს.ს.ი.პ. საქართველოს ადვოკატთა ასოციაციის სიმბოლიკისაგან.

ეთიკის კომისია განმარტავს, რომ ს.ს.ი.პ. საქართველოს ადვოკატთა ასოციაციის სიმბოლიკის გამოყენება, სატიტულო ფურცელზე, ბეჭედზე, სავიზიტო ბარათზე და სხვა მსგავს ატრიბუტიკაზე, არ უნდა იყოს შეცდომაში შემყვანი ნებისმიერი პირისათვის, რომელიც გარკვეულ ინფორმაციას ღებულობს ასეთი სიმბოლიკით აღნიშნული დოკუმენტიდან.

მოცემულ შემთხვევაში იმ ადვოკატის სუბიექტურ დამოკიდებულებას, რომელიც იყენებს ადვოკატთა ასოციაციის სიმბოლიკას, არ ენიჭება მნიშვნელობა. თუნდაც სრულიად კეთილი განზრახვის არსებობისას, ადვოკატთა ასოციაციასთან მისი სიმბოლიკის გამოყენებით, ფიზიკური თუ იურიდიული პირის მიერ გარკვეული კავშირის მითითებისას, მესამე პირებს შეცდომაში შეყვანის რისკი არ მცირდება.

ეთიკის კომისია განმარტავს, რომ ადვოკატთა ასოციაციის ლოგოს რაიმე ფორმით გამოყენების შემთხვევაში, თუნდაც მინიმალური საფრთხის არსებობა, რომ მოხდება მესამე პირების შეცდომაში შეყვანა, არიდებული უნდა იქნეს ადვოკატთა ასოციაციის წევრის თუ საადვოკატო ბიუროს მიერ, რომელთაც “ადვოკატთა შესახებ” საქართველოს კანონითა და ადვოკატთა პროფესიული ეთიკის კოდექსით დადგენილი პროფესიული ღირებულებები აქვთ

გაცნობიერებული და ამ ღირებულებათა პატივისცემა და მორალურ-ზნეობრივი კრიტერიუმის დაცვა მოეთხოვებათ.

გასათვალისწინებელია ის ფაქტიც, რომ ადვოკატი ან საადვოკატო ბიურო შესაძლოა ახორციელებდეს სხვადასხვა სახის ქმედებას, რომელიც არ უკავშირდება კლიენტის ინტერესების დაცვას და წარმომადგენლობას, მაგალითად, გარკვეული ინფორმაციის შემცველი ცნობის გაცემა, რომელიც შესაძლოა აღქმული იქნეს როგორც ს.ს.ი.პ. საქართველოს ადვოკატთა ასოციაციის მიერ გაცემული ცნობა.

ეთიკის კომისიას საჭიროდ მიაჩნია აღნიშნოს, რომ ადვოკატთა ასოციაციის ლოგოს გამოყენების შემთხვევაში, შესაძლოა წარმოიშვას არაკეთილსინდისიერი კონკურენციის საფრთხე. ადვოკატი ან საადვოკატო ბიურო, რომელიც საკუთარ ატრიბუტიკაზე იყენებს აღნიშნულ ლოგოს, შესაძლოა მესამე პირებისათვის სარგებლობდეს სანდოობის უფრო მაღალი ხარისხით, მისი სწორედ ადვოკატთა ასოციაციის სახელით მოქმედ პირად აღქმის გამო, სხვა ადვოკატთან ან საადვოკატო ბიუროსთან შედარებით, რომელიც არ იყენებს ასოციაციის ლოგოს, როგორც საკუთარს.

საქართველოს ადვოკატთა ასოციაცია ერთიან სტანდარტებს აწესებს მისი წევრებისათვის. ადვოკატის მიერ კორპორაციული სიმბოლიკის გამოყენება ინდივიდუალური მიზნებისა და გადაწყვეტილებებისათვის, შესაძლოა, გავლენას ახდენდეს პოტენციურ კლიენტზე.

ეთიკის კომისია რეკომენდაციის გაცემისას ითვალისწინებს, რომ პრაქტიკაში შესაძლოა კონკრეტული ადვოკატისა თუ საადვოკატო ბიუროს მიერ მოხდეს ადვოკატთა ასოციაციის ლოგოთი სარგებლობა ბანერზე საინფორმაციო ბრიფინგის გამართვისას, სატიტულო ფურცელზე, საიდენტიფიკაციო მონაცემებში საქართველოს ადვოკატთა ასოციაციის იურიდიული მისამართის გამოყენებით და სხვა. აღნიშნული და მსგავსი შემთხვევები მაღალი ალბათობით გამოიწვევს გარკვეული პირების შეცდომაში შეყვანას და კონკრეტული ადვოკატებისა თუ საადვოკატო ბიუროს გაიგივებას ადვოკატთა ასოციაციასთან.

მსგავსი შემთხვევების პრევენციის მიზნით მიზანშეწონილია, ადვოკატმა არ გამოიყენოს ადვოკატთა ასოციაციის ლოგო. შესაძლოა სატიტულო ფურცელზე, სავიზიტო ბარათზე მითითებული იქნეს, რომ პირი არის ს.ს.ი.პ. საქართველოს ადვოკატთა ასოციაციის წევრი, ადვოკატის სიითი ნომერი ერთიან რეესტრში, პირადი მისამართი, ტელეფონი და სხვა პირადი საკომუნიკაციო რეკვიზიტები. ადვოკატმა, საადვოკატო ბიურომ არ უნდა გამოიყენოს ადვოკატთა ასოციაციის ლოგო და არ უნდა შექმნას მესამე პირების შეცდომაში შეყვანის და ადვოკატთა ასოციაციასთან გაიგივების გაუმართლებელი საფრთხე.

დასკვნა:

ადვოკატის ან საადვოკატო ბიუროს მიერ ს.ს.ი.პ. საქართველოს ადვოკატთა ასოციაციის ლოგოს გამოყენება კანონით არ არის აკრძალული, თუმცა, ასეთი ქმედება შესაძლოა მესამე

პირებისათვის იყოს შეცდომაში შემყვანი, გამოიწვიოს კონკრეტული ადვოკატის ან საადვოკატო ბიუროს გაიგივება ს.ს.ი.პ. ადვოკატთა ასოციაციასთან და შექმნას არაკეთილსინდისიერი კონკურენციის საფრთხე. ადვოკატთა ასოციაციის სიმბოლიკა მისი, როგორც კონკრეტული ს.ს.ი.პ. - ის განმასხვავებელია და გამოარჩევს მას სხვა იურიდიული პირებისაგან, დამტკიცებულია ადვოკატთა ასოციაციის საერთო კრების მიერ და მიიჩნევა ასოციაციის კუთვნილებად.

ეთიკის კომისია მიზანშეწონილად არ მიიჩნევს ადვოკატთა ასოციაციის ლოგოს გამოყენებას სატიტულო ფურცელზე, ბეჭედზე, სავიზიტო ბარათზე, ორდერზე, სარეკლამო ბანერზე და სხვა საშუალებებზე, სადაც ადვოკატთა ასოციაციის ლოგოს გამოყენებით, შესაძლებელია მიჩნეული იქნეს, რომ საკუთარ პოზიციას გამოხატავს ასოციაცია და არა კონკრეტული პირი.

რეკომენდაცია არ არის სავალდებულო ეთიკის კომისიის ან სასამართლოს მიერ რომელიმე დისციპლინური საქმის განხილვისას. თუმცა შესაძლებელია გამოყენებული იქნეს ერთ-ერთ წყაროდ ეთიკის კომისიის გადაწყვეტილებაში.

კომისიის თავმჯდომარე: /ეკატერინე გასიტაშვილი/

კომისიის წევრი: /დავით კაკაბაძე/

კომისიის წევრი: /ირაკლი შონია/

კომისიის წევრი: /ცირა შუბითიძე/

კომისიის წევრი: /გიორგი ბეგიაშვილი/

კომისიის წევრი: /ემზარ პაქსაძე/

კომისიის წევრი: /ლავრენტი ქავთარაძე/

კომისიის წევრი:

/კობა ბოჭორიშვილი/

კომისიის წევრი:

/დავით კვაჭანტირაძე/

ეთიკის კომისიის წევრის ლავრენტი ქავთარაძის

განსხვავებული აზრი

ეთიკის კომისიის 2013 წლის 15 ნოემბრის რეკომენდაციაზე ადვოკატთა ასოციაციის ლოგოს

გამოყენების თაობაზე

ვეთანხმები ეთიკის კომისიის წევრების გადაწყვეტილებას საადვოკატო ბიუროს - იურიდიული პირის მიერ ს.ს.ი.პ. საქართველოს ადვოკატთა ასოციაციის ლოგოს გამოყენების არამიზანშეწონილად მიჩნევასთან დაკავშირებით, (ეთიკის კომისიის რეკომენდაცია №018/13) თუმცა, არ ვეთანხმები აღნიშნულ რეკომენდაციას ადვოკატთან, როგორც ფიზიკურ პირთან მიმართებით და მიმაჩნია, რომ ადვოკატის, როგორც ფიზიკური პირის მიერ, ს.ს.ი.პ. ადვოკატთა ასოციაციის ლოგოს გამოყენება იდენტიფიკაციის საშუალებებზე მიზანშეწონილია.

ვინაიდან ადვოკატი არის ს.ს.ი.პ. საქართველოს ადვოკატთა ასოციაციის წევრი, მას არ უნდა ეზღუდებოდეს ასოციაციის ლოგოს გამოყენების უფლება სატიტულო ფურცელზე, ე.წ. „ბლანკზე“, ბეჭედზე და სხვა მსგავს ატრიბუტიკაზე. ადვოკატთა ასოციაციის ლოგოთი სარგებლობისას, ადვოკატმა უნდა მიუთითოს სახელი, გვარი, სიითი ნომერი, მისამართი და მისი იდენტიფიკაციის სხვა საშუალებები. აღნიშნულ შემთხვევაში, არ მოხდება ამ ადვოკატისა და ს.ს.ი.პ. საქართველოს ადვოკატთა ასოციაციის გაიგივება და მესამე პირების შეცდომაში შეყვანა.

ლავრენტი ქავთარაძე

ეთიკის კომისიის წევრი